

T9117/4344(18)

小倉山房詩集

八

小倉山房詩集卷二十五

丙申丁酉戊戌

錢唐袁枚子才



正月十五日園中飛下一鶴

一團白雪青天落園丁走報來仙鶴來自何方產何土
鶴不能言但起舞園中三鶴一鶴單物得其偶居之安
主人當作不速客取著筮之敬終吉

哭座主鄧遜齋先生

有序

戊午科余與平西大將軍阿公廣庭同出先生
門下先生每稱分校得士一文一武今年正月
將軍平定金川而先生先一年捐館枚故賦詩
志哀先生諱時敏四川人官大理寺卿

當年絳帳同升客此日凌烟第一勛共說門墻原不忝
敢云文武竟平分名書虎榜三生夢甲洗龍沙萬里雲
告奠九原公亦笑是誰衣鉢有將軍

過瞻園弔託師健尚書

十年不見託尚書重過瞻園感舊居匝地風花春事換
滿墻烟墨雨痕疎老臣力盡還朝後國士知深見面初
擬賦八哀詩未就幾行衰淚落衣裾

哭逸園主人

有序

主人姓程名鍾字在山吳之隱君子也與其妻
生香居士全有詩名所居逸園在西磧山下余
過訪不值次日君入城始得一見別後再投以

詩而君亡矣其佳句云高樓鎮日無人到賸有
山妻問字來可以想其風調

與君一見了前緣芳訊重投便杳然四海名園推梓澤
半生嘉偶伴伶元似知數盡將山賣

子到園時聞已售與江氏定有

詩存待我傳西磧風烟太湖月從今不泛子猷船

鷄

養鷄縱鷄食鷄肥乃烹之主人計自佳不可使鷄知

送保將軍廟堂之施南

吳下驪歌夾耳聞我來剛值送將軍請看江上雙旌影
已似將飛一片雲

履曳星辰劍上方偏教生性愛文章倉山幾曲風華調

君盡能歌我轉忘

千條紅燭兩枝花
餞別依依小杜家

開周

他日巴山聽

夜雨更誰行酒進琵琶

弓刀獵罷萬山青
風捲紅旗過洞庭
可帶橫塘一枝笛
夜深吹與老龍聽

善撫生苗與熟苗
追陪嚴武與韋臯
八風平處雙聲穩
一卷新詩卽六韜

送君南浦草萋萋
望見楊花首欲低
一樣天涯送行客
楊花能到夜郎西

過蘇州有懷南溪太守新遷觀察轉漕北行

六十黃堂兩鬢清
一朝丹詔下神京
高年豈望遷官

職

聖主偏能記姓名
緩緩漕糧東魯去
煌煌衣錦故

鄉行長河月色三千里
萬艣齊聽號令聲

袁絲別後下姑蘇
悔作尋春范大夫
知己偶然心上有
美人真覺世間無
難將蘭漿迎桃葉
且坐甘棠聽鷓鴣
愁過南衙文讌處
旌旗人遠月明孤

哭侍衛明公

有序

公名仁將軍忠烈
公名瑞者之弟
年少能詩在
尹相國處見予
篇咏寄聲索贈
予感其意書扇
貽之而公已從
征金川歿于軍矣

遠蒙京國問才名
知己何曾一識荆
團扇詩才從北寄
雕弓人已賦西征
通侯門第文兼武
上將沙場死亦生

遙莫寒雲招左轂海天兜率盡交情

某學士已謫降矣猶責余不以公服相迎余雖謝
過而退後不能無詩

何苦蓬門閣閣譁私蛙猶道是官蛙一枝紅蓼雖孤潔
生就人間瑣碎花

眼入夜昏澁見燈輒睽戲賦二詩

薄暮雙眉蹙飛珠繞眼睚望洋空有嘆視物總如傷無
復宵攤卷何妨早就床譬如人世上原自沒燈光
秉燭宵遊興忽差倍教白日惜年華想來老亦多情累
兩眼渾如夜合花

升沉

山色蒼茫落炤微升沉到處有天機楊花自繞蛛絲上
莫怪春風吹不飛

江西方伯楊西峯巡撫江蘇五月受篆寄賀四章
故人開府到吳中捧日葵花色正紅八座有誰堪此席
半生惟我最知公智珠在手風雲澗卿月當天氣象空
真個恩膏似流水大江西下大江東

金閭何處不甘棠回首春風二十霜

公宰昭文時
年才弱冠

在昔

東廂聽鼓角于今南面握牙璋官從舊地遷才樂人是
相知喜更狂料得軍民齊額手中丞玉貌未曾蒼

記否當年聚白門兩家燈火話黃昏一餐不作常賓待
萬事都從絕頂論

公精廚饌他
客不得與

宦海光陰流水逝棲霞

遊伴幾人存

謂莊潘諸公

而今半壁東南主爲我應留酒百

尊

小人有母受恩施客歲稱觴使者馳雙束冰絲園客繭
一行珠字白華詩情深膠漆真無忝分隔雲泥兩不知
寄語關西楊太尉相尋未敢出山遲

贈慶郎

寂寂朱門當館娃行行珠字傍牕斜世間只有張公子

竹齋

解采華林

班名

第一花

蛺蝶雌雄且莫分女兒香贈女兒熏遙知燒處雙烟起
化作仙童一朵雲

欲試芙蓉雨後妝青溪同浴兩鴛鴦分明一掬僧房水

抵得華清第二湯

客牕寒重夜眠遲贈汝吳棉有所思願得他生爲翠被
鄂君身上覆多時

齒痛悶坐戲作長歌

前有萬古去漠漠後有萬古來滔滔當中忽放我一人
不前不後生今胡孫曾以後之人物不接見開闢以前
之史冊誰傳抄徒然苦受倉頡累四千年中文字來煎
熬就使學業追孔孟勛業全夔臯猶恐一朝乾坤毀也
如雲氣隨風飄何況硜硜居空谷寂寂守蓬茅五岳不
曾走蠟屐六十尙未麾旌旄造化小兒漸欺我齒痛呼
晷聲嗷嗷眼前未死先冥漠詭談傳世不朽殊無聊擬

學古之行樂人酒飲公孫穆色好公孫朝已爲財力所
制限名教所阻撓再欲將身送還天與地又被殘形恒
幹相拘膠只得支頤枯坐無一語自弄筆墨當笙簫窸
戚高歌白石爛杞人自信青天牢方寸之間驅水火入
荒以外馳輪尻身隨黃頰青曾歿處歿冤憑白蜺嬰拂
招時招但願生生世世莫作有情物一任劫灰盪滌吹
我作泰山之頑石大海之波濤

再贈慶郎

三月春光上已濃笙歌人集水西東樹梢挂起燈如海
炤得紅兒分外紅

捲簾招月坐蕭齋意欲留春事竟諧寄語阿瞞私誓了
他生爭及此生佳

爲儂指引若耶溪笑上粧樓躡小梯奪婿吳娘真有福
吹簫全住板橋西

開過紅榴鳥欲飛相思能不夢依依願卿身似春潮長
早到胥江晚卽歸

南溪遷江蘇司臬再賀一詩

孔幾久被天心眷重疊恩綸下玉坡千里人才瞻
舜日三遷官總聽吳歌舟因久泊風彌順花爲遲開露
轉多我與蒼生齊引領者畚報稱更如何

人老莫作詩

鶯老莫調舌人老莫作詩往往精神衰重複多繁詞香

山與放翁此病均不免奚況于吾曹行行當自勉其奈
心感觸不覺口咿啞譬如一年春便有一年花我意欲
矯之言情不言景景是衆人同情乃一人領

晚遊古林寺

一鐘打出滿堂僧佛面金光半閃燈籠樹無聲風小定
袈裝有影月初升講經未必花能笑拄杖微聞石欲應
底事空王夸解脫春來不解半池冰

余久離祿仕而戚里紛紛誣諉不已初頗厭之既
乃有悟于物理變與爲喜故作是詩

戚里紛紛太糾纏閑思物理忽欣然樹堪避雨多棲鳥
水不通河少泊船石佛疲津雖欲卧雲仙捨藥且隨緣
人求終比求人好平著心看卽是禪

卅年

卅年山館住悠悠十賚誰交陸敬游插處綠楊成古樹
畜來黃口盡蒼頭釣竿手顫魚難得棋局心忙子不收
只有吟詩如老將窮追佳句獲才休

野廟

白石神君廟黃車使者臨客廳雞語慣僧頂鵲巢深錦
雨通宵暗金苔滿地陰土和香一炷留贈古檀林

折花

看書時是看花時兩事商量割愛遲只好折花書案供
也聞香氣也吟詩

題宋人詩話

元聖雖不作何王不袞裳終日嗜菖蒲未必皆文王孔子所以聖豈在不撤薑我讀宋詩話嘔吐盈中腸附會韓與杜瑣屑爲夸張有如倚權門凌轢衆老蒼又如據秦華不復遊瀟湘丈夫貴獨立各以精神強于古無臧否于心有主張肯如轅下駒低頭傍門墻

悔軒太守長淮利涉圖

長淮泱泱浪拍山舟中太守目營然爲貪四顧眼界寬船篷盡卸船帷寒蕩舟者急腰背彎擊楫者猛鬚連髮奚童持帽容清便飄飄華蓋風吹偏隄旁樹底聲喧闐衙前散從將馬牽堯牟雉尾衝寒烟弓刀旗幟鞍轡棧

一一錯襍楊花間問公何事心憂煎腰輿不坐偏扣舷客秋河決黃淮連魚頭赤子相比肩救災如救野火燃黃堂官作羣官先疏排貴迅築貴堅何者宜堵何者穿非身親到心胡安民視公身如大船捆載萬戶利涉川精誠所感神亦憐支祈可鎖鼉可鞭饑者與飯寒與棉波濤聲裏頒金錢非公孰把 皇仁宣雙漿搖去重回旋左視右視求萬全我聞史起能引泉河隄謁者稱王延煌煌史冊相留傳以公作配何慙焉誰知公意猶拳拳畫圖當作越膽懸道民受病難遽痊元氣可復須三年此語公然直奏 天

悔軒一稔之中驟遷觀察再遷方伯索詩爲賀

兩度 恩綸下玉京三遷官不出江城風高太覺雲行
速惹得閒鷗聽也驚

更喜新衙接舊衙半條街近好移家官遷真個鶯遷似
只隔一墻紅杏花

中山王府舊樓臺迎過 鑿與花尙開此日遭逢勝元

九遷官兼得住蓬萊

東南民力近何如儒者經綸定有餘好惜分陰懷祖德
青燈還擷幾行書

北海尊開酒不辭匡衡翼奉本同節自憐三十年前客
合有瞻樹老樹知 與公同出孫文定公門下

會賦園中景十篇曾交碑碣記先賢而今得遇文章伯

合浦珠還豈偶然

託尙書瞻園碑現
寄隨園公將歸之

哭高東井孝廉 有序

東井名文照湖州武康人高才博學父爲南捕
通判有廉名東井中甲午鄉試客死京師年三

十無子

風傳消息自幽燕聽說斯人不永年循吏兒郎好才子
一齊抹掇也由天

二十萬言書誦畢八千餘紙手抄忙不知一片心頭血
客邸誰收古錦囊

目空四海無前輩心折千篇有老夫此日等身諸著作
九原抱著見韓蘇

小倉山房 卷二十一 九
關情夜燭與晨燈甚矣吾衰仗後生豈料挈雲心事健
一枝秋桂了前程

題黃梁夢枕圖

非因非想夢難通人有心情各不同我過邯鄲曾有夢
夢攤書卷萬花中

心中賢人歌寄錢璵沙方伯

書中有賢人其人不可再心中有賢人其人宛然在其
人在何處閩江爲屏藩吾幼與同學吾長與同官温公
愛蜀公生前爲立傳吾亦愛錢公意欲書其善公書善
歐趙公詩善白蘇以兩善稱公淺之爲丈夫

天子南巡狩 聖書頒諄諄誠恐供張費累彼元元民

江督黃文襄陰違而陽遵孤行一己意束下如濕薪其
人養威重上相不敢嗔公乃手彈章焚香達 紫宸

天子立名見問汝所知因公奏御史官言事重風聞倘
問所來由是絕言者根 天聽爲之動將黃訓飭頻有
此小臣直彌彰

聖主仁一時王侯駭爭來窺公門以爲朝陽鳳以爲獨
角麟誰知公恂恂公貌如婦人

金吾有邏騎獰獰虎而冠內府四十名白日橫行慣公
視永豐倉此輩猶狎玩其魁名李五喧呶薄几案公怒
械繫之封章奏玉殿 詔命盡革除爲首者誅竄百僚
舞于衢路人相與嘆神羊挺然立百邪已消半何況鳴

一聲根株自痛斷

彰化內凹莊生番殺黔首賴白兩姓家二十有二口故
事番作惡武吏有責成生番殺人重熟番殺人輕大吏
爭護前各以熟番報公時巡臺灣獨以生番告洋洋海
風起偏遲御史章奏騎旣濡滯所奏又乖張 天語加
切責大吏滋不悅詞者來調停誅公改前說公指窓前
山是豈可動乎苟其狗有位何以對無辜亡何矯虔吏
買頭作誣証事發得上聞昭昭黑白定

三吳民風柔俗吏恣威福但博大府笑不顧小民哭公
莅觀察任上手無留獄其一竟劾去其一稍瑟縮蠹胥
擒五鬼積案掃千牘懷磚者改行舞文者坻伏片紙告
誠張萬民雪涕讀傳抄未停手曲踊時頓足可惜僅一
年旌旗遽入蜀民恨公來遲又恨公去速至今說公名
父老淚簌簌

古有班馬才能記非常事今有班馬才苦無事可記我
欲得公狀催公作郵寄公曰我生平碌碌無他異虛心
而實力祇守此四字大哉明公言四字談何易其惟聖
人乎當之庶無愧願公永勉旃徐徐俟其至我欲立公
傳恐公事正多我欲少遼緩又恐傳者訛故且托韻語
傳播爲詩歌歌公更勗公公其慎晚節空山有故人含
笑看史筆

題幽光集後

王陸禔至高文照凡二十餘人

河嶽英靈氣未伸有才無命最傷神何時得上韋莊表
追賜科名十六人

所見

牧童騎黃牛歌聲振林樾意欲捕鳴蟬忽然閉口立

遠眺

秋江遠眺碧雲空一笑啞然對晚風鷓鴣魚終日立
不曾肥過信天翁

留別蘇州主人唐靜涵

君家久住竟忘家兒女同聲喚阿爺借慣舊書多脫線
代栽新樹暫停花商量小食先呈譜塵亂飛棋更鬪瓜
如此主員能有幾戲將瑣事記些些

謝渤海相公賜老母人參

一朵慈雲下碧空萱堂頃刻起春風扶衰正想尋靈藥
造命由來屬相公價比兼金千鑑貴形如瑞麥兩歧同
殷勤手付家僮意小草無言有寸衷

公慮材官賚來有
費卒賞故喚家僮
赴衙親
封賜之

哭唐靜涵十二首

吳下霜飛九月天唐衢竟賦小遊仙傷心三十年中事
歷歷捫胸尚宛然

初飲華堂酒一卮青年意氣兩相知屏風窺客金釵滿
正是君家全盛時

奪得鸞篋返石城三郎懊惱不勝情是誰巧作鶯花主

不負黃衫俠士名

事載聰
娘墓志

從此雲龍角逐忙
栽紅暈碧兩相將
棣華書舍三間屋
便是儂家選佛場

寒山聽雪倚斜曛
鄧尉探梅踏白雲
一輛籃輿兩枝槳
嬉遊何處不同君

護世城中美膳難
多君親手製盤餐
晨鳧北雁商量處
忙殺河曾舊食單

龐公妻子都無避
稽呂相思便駕車
笑我身如春燕子
一年一度宿君家

爲喝臬盧六子紅
驚心風浪太匆匆
忝爲北海孫賓石
曾匿臺卿複壁中

漸漸清霜滿鬢來
欣欣且喜老懷開
衣衫質盡長生庫
猶入花叢醉幾回

朱絃兩度斷琵琶
聘得雲仙蔡少霞
一夜長眠人不醒
繞床嬌女尙呼爺

今春置酒舞曹婆
蹇姊彈箏阿子歌
豈料人生真局促
黃公壚下卽山河

早知此會成長別
悔不勾留再一宵
量取長江盛老淚
君寬舍我更誰招

閱歷

閱歷名場四十春
一言常自說津津
久居軒蓋無佳士
不讀詩書有俊人

昭君

妾彈琵琶非自傷傷心還是爲君王千秋幾個傾城色
一旦輕輕付遠方君王若果非知己妾亦甘心絕域死
如何賤妾遠行時詔書正選良家子良家子比妾姝問
旁人如不如

偶觸

偶觸危機黯自傷白頭無語立斜陽可能野谷空山裡
禁住梅花不要香

偶戎

安身浮世外行止自徐徐白鷺替迎客春風爲卷書
吟罷白書竹茶烟吹入窻輕雲含雨重孤蝶得花雙
一月關門住忘書記復清詩情似池水都向靜中生

悼花

梅花盛開時杏花若相覲杏花正紅酣海棠有爭意一
花復一花循環作交替容華非不佳過者便憔悴春風
非無情不能將花繫開落曾幾時在花如一世旁有看
花人凄然自隕涕

玩月

無月夜可憎有月夜可愛忍把爛銀盤揮之出門外恰
思人未來滿地月橫陳如何人一來月光飛上身思之
不可得掬之若可取忽然疎影搖梅花如欲語

自懺

仙人九障名居一上士關防口最先安得四禪天上住
一生風不到牕前

和沈觀察遊華山韻

仙人掌上馭風行玉女頭盆拄杖聲兩角孤雲天一握
千尋飛瀑月三更近招白雁烟中語遠望黃河樹頂生
擬把綠章奏闔闔滿腔心事沈初明

造假山

半倚青松半掩苔一峰橫豎一峰迴高低曲折隨人意
好處多從假字來

感往事有作并序

予爲鳳齡事至今悒悒因憶己巳春卜妾平湖
有良家子楊氏許贈不許見事故中止及買舟
歸而其家追余往見則疴作不能行矣嗣後或
交臂失或來歸後又遣去舛午膠轕不一而足
大有悟于佛氏因緣之說故作是詩

綺麗情懷閱歷身青天碧海漫尋春每看遭際干般幻
始信因緣兩字真花到手時偏不折壁從懷後轉生真
暗中竟有牽絲者笑我徒爲傀儡人

山頂蘭

一枝幽草植山阿開旣飄零落又多不是無人采香色
其如生處太高何

謝悔軒公饋烏鬚藥

買染鬚藥如買酒年年一介馳京口欣逢長者陶通明
肯賜刀圭變老醜每對明鏡愁鬚蒼使趨華堂索秘方
果然諸毛餐黑水頃刻滿面消秋霜我聞度世真神仙
不忍獨自作少年又聞堯染臯陶舜染禹彼此沾濡聖
如許先生報國恩無量常恐年衰意惆悵但見青葱
繞頰生掀髯一笑心還壯小人有母忘兒衰視我花甲
如嬰孩得教綠髻同潘岳勝舞斑衣學老萊旁人不知
笑吃吃道此兩人媚側室噫吁嘻君不見從古友朋膠
漆情紛紛擾擾豎白鳴何如同讀太元經

卧鐘

一鐘倒卧鍾山坳后夔敲後無人敲宮商滿腹悄無語
草蟲亂叫秋天高我來駐馬急拊視樂乳模糊土花紫
篆文隱隱莓苔封露漬斑斑鉛水洗口寬千石容有餘
身重萬人扶不起憶昔橫陳寢殿中四廂九奏聲隆隆
曾招鼉鼓聲相應曾喚宮娥睡不濃一朝世事浮雲過
太常樂散金甌破尙有釣天夢未終可憐小劫身先墮
鳥踏還疑鳧氏鑄雪飛似伴袁安卧飄泊泥沙不計年
摩挲幾度遇神仙牧童手小爭來擊佛子樓低不敢懸
我聞禹鼎長淪沒何況銅駝困荆棘龔俗誰爲傾耳人
長眠且入無雷國別汝回頭感不勝千秋老物定神靈
年年霜降商山日可作鯨魚吼一聲

寄陝西撫軍畢秋帆先生兼呈令舅張少儀觀察

九天臚唱掣金鰲三輔風雲擁節旄殿上策猶推賈董
關中功已重蕭曹軍興五載民如忘章奏十回 帝總
褒想見終南山色裡一輪卿月比前高

春滿軍門有所思百花頭上看花時采風手纂長安志

感舊情深吉甫詩

公修西安志梓尹文端公詩

已屈君平參幕府

友冬

更招小戴作經師

咸敬

知公偶折金河柳也折人間第一

枝

下官銜本隸旌麾卅載身因奉母歸一面未曾瞻華嶽
八行先自賜珠璣游仙夢記風前遠隔水琴彈海上稀
冬感羔裘千里贈教儂暫脫芟荷衣

聽說張敷住涓陽故人振觸九回腸自然杖履身還健
多少雲龍事未忘半世韶華同逝水一門宅相好輝光
煩公代寄滄桑信最小袁絲髻已蒼

附少儀觀察和詩

海上相期釣六鰲十年謂可建旌旄致身公自登蓬
闔草檄吾偏雜掾曹裘橐何曾羸陸賈樂章漫擬賦
王褒當年誰及終軍少作賦聲摩 漢殿高

白下於今有去思中牟化美漢京時直聲三上軍門
牘儒雅頻賡相國詩鰲面老人稱衆母烏衣弟子奉
嚴師尋春杜牧非遲暮幾度吟憐綠滿枝

懶從關塞擁高麾遽買春江一棹歸繞座光華發
鼎驚人詞賦擅璇璣神仙伴侶閨房滿鐘鼓園林俗

客稀盤谷有親康且壽肯將公袞換萊衣

笛聲淒切聽山陽感舊懷人幾斷腸

四十年來京華故人零落殆盡

世閱冰霜元易老交深貧賤最難忘丹山近企將雛

信錦字遙分照乘光一事報君堪大噓齒牙落盡似

張蒼

偶閱廣輿記載盤古冢凡有三處其附會可知然

題目自佳戲題一絕

無人挾長居前輩有力開天看混茫底事一坏先作俑

神仙留着讓軒皇

荅朱海客先生見寄

未見投一札已見投一詩先生于鄙人殷殷如有私我

昨過京口離家月已期忍住欲歸心走叩先生扉先生

方擁帳說經為人師地居寶晉齋米顛所留貽卷簾金

焦落穿庭鳥雀飛呼兒出見我森然兩瓊枝解作銀鈎

楷能歌幼婦辭我受僕夫促身坐心已馳胸中千萬語

如蠶未吐絲不恨相別速只恨相逢遲何時得重來定

有江雲知

香亭弟僦居白門來往甚懽今年服闋有仍赴蜀

中別駕之行予老矣難乎為別賦詩送之

送汝萬里行戴我一頭雪未免老人情含笑看金玦憶

昔壽春去尙且情依依矧今蜀道難知汝幾時歸汝歸

自有時我年恐難待阿通才三齡仙風吹不大何田復

何圃幾書又幾槩錄冊交與汝汝應知我心

汝家多弟昆我家多姊妹從子及孤甥因之各成隊一人一婚嫁向平力不勝若不藉微祿此累何由清汝非貧官職衰年捨我去我非吝一廛不肯留弟住展轉復展轉兩家事艱難羨殺脊令鳥雙飛共一山

前年弟歸來買園與我隣公然東西屋兩邊住機雲風和兄嫂往雨晴叔姒來庖奴鬪羹好小婢報花開似此天倫樂一日抵干霜如何青天月團圓難久長池塘春草生阿連不可見分後紫荆花風前顏色變

歐公居頽上澗岡情無人似味首邱義論者常紛紛我于隨園旁卜兆塋顯考生壙附其間較歐稍爲好終竟大母墓尙在西湖西歲雖遣人祭此心常悽悽兩家小兒女結婚須故鄉庶幾寒食節容易紙錢將

隨園兩山凹垣墻無所施邱壑雖云佳居室非所宜笑我烟霞癖經營三十春一水與一石處處精神存古來高人宅多捨作蘭若我乃無懷民豈是佞佛者乞汝改家廟祀我于西齋或者峴山巔叔子魂歸來

仙人有九障虛名是一端宏景曾此累而我亦復然挂冠三十載著書一尺餘已付麻沙本憑人作毀譽所嫌在官日惠民無寸功輿歌太詭衆聞之兩頰紅宋儒伊川子作狀狀伯醇傳兄無溢詞所貴傳其真

我年十八時叔父客西粵託我身後事諄諄寄手札此

札藏篋內隨身不敢離燕南與趙北時時偷眼窺迎叔
歸墓畢拜向靈前焚泣陳無所負可慰九原人我今學
叔父一一付驪歌望弟學阿兄弟意將如何

意有所得雜書數絕句

一樣三株木筆栽兩株萎謝一株開分明草木尙如此
何況人間才不才

擲果當年事已休閒來曳杖水邊遊無端樹有撩人意
紅杏一丸打白頭

滕六才終巽二飄枝枝修竹劾芭蕉階前只有薇蕪草
偏在風中不動搖

自尋低竹補籬笆雨後高雲襯落霞驚去鴛鴦真得意
雙雙全上合懽花

碧桐一樹倚雲端五月離離雪蕊攢壓屋濃香高百尺
世人忘却當花看

老去年來目力微回黃轉綠認依稀落花裊着游絲颺
錯認空中蝴蝶飛

全家試水泛輕舠小妹張篷阿姊推喜極兒童雙手戰
釣竿絲上一蝦跳

常自閒中玩物情碧欄杆外作游行香蘭性愛風前種
爭怪詩人不好名

莫說光陰去不還少年情景在詩篇燈痕酒影春宵夢
一度謳吟一宛然

孫勗堂舍人殉難金川其門人汪燾以遺像屬題
舉世紛紛都畫像畫成幾個傳人樣汪倫持像索我題
卷雖未展神先王道有先師孫太初槃槃才子擅名譽
曾將水榭風廊意寫作人間行樂圖一朝捧檄馳西蜀
正值天兵剿蠻觸強著書生短後衣也隨主將抽金僕
妖星半夜落危礮疋馬無聲陷賊巢束手姜維投鎧仗
甘心光弼用靴刀泣語家奴莫悽愴男兒報國真無狀
速取冠巾一物歸好教兒女招菟墓 天恩頃刻下明
堂錫典榮生綽楔光可憐太死終軍早不見頭懸南越
王門生風義高前古展卷淒涼淚如雨豈料當初翰墨
緣竟成此日丹青譜我與斯人一見難敬題短句發長
嘆願將此本描千幅當作金鑄范蠡看

揚州康山詩爲主人江春作

青山如高士不肯居城中難得邗江城中藏一華峯相
傳棲息者昔爲康武功于今屬江淹規址增穹隆綺寮
花歷歷月榭烟重重我來逢日暮海棠開深紅高登九
層臺恍入凌霄宮近覽一郡盡遠極諸天空指掌月欲
墮乘雲仙可逢凜乎難久留此身非孤鴻

竹垞曾題詩有約江春到主人名姓同巧合如天造在
昔楊憑園香山來憑眺蕭復舊樓臺王縉領其妙江山
怕冷落羅綺須炫耀君今繼前徽風雅有全調宜乎海
內人爭買邗江棹上迎丞相車下招居士屨分領邱壑

情合參仁智樂燈紅花不落酒滿月常照康公如有知
凌雲應一笑

贈朱子穎轉運卽以留別

會騎竹馬侍尊公五十年華逝水同敢以通家參末坐
偶因招隱接清風枚十二歲受知于尊人平山影落雙

旌上燕寢秋生一雁中難得王濛齊抗手開樽談到漏

聲終謂夢樓太守

平生秋月比襟懷小李丹青大謝才愛向蜀江看峽險

嬾從秦棧叱車回九重語密恩仇忘公弔某制府云三年畢竟能淹我一

敢負公語何曾萬里遊多眼界開莫怪使君風骨冷泰山頂上

抱雲來

讀罷秋原校獵篇三唐音節八風宣雲中金翅身摩地

塞上霜笳響入天惜我雄心聽已老借公如意舞猶顛

相傳手射潢池賊真個天狼早避弦天狼早避絃公集中句

白髮征夫別畫堂主人情重費周章佩貽屈子三湘草

心表南豐一瓣香蒙贈素蘭香珠出岫雲仍歸舊壑入林鳥尙

戀斜陽從今地有鶯花主杜牧揚州夢正長

舟中聞鐘聲有感于先賢考亭之語賦詩箴之有序

朱子在南安夜聞鐘聲大懼曰便覺此心把握

不住

半夜聞鐘響此心隨鐘往彼來非惡聲此去非妄想緣

何考亭子自慙把不禁分明儒學淺墮入禪學深子在

齊聞韶何常不動心

哭劉介菴

有序

君名景福山西人歷宰福清江浦諸邑最後降
真州丞以壽終

善人與道適不在親簡編醉人墜無傷由于其天全我
友介菴子通籍五十年牽絲閩海地投老邗江邊其人
性夷垢土色而敦顏不以矯虔逞不以苛廉傳所到識
政體吏民靜且便清俸一土手萬弩如開弦縣僮爲主
進門幹替持錢偶聽半曲佳柘枝舞欲顛偶愛一伶美
纏頭費百千堂前燈似海棠下酒成川寧可斷炊炊不
可無管絃旁人代眉蹙慮其生計艱君但掉頭笑萬事

且由天未渴莫掘井未寒莫思棉卿自行卿法我自有
我憐果然負課萬竟能脫罪愆弄兒將恩報破產來爭
先大吏知君愿當作老物憐藍田縣丞記許其讀終篇
古稀已過四才命將車懸朝雖將車懸夕已歸道山畢
竟行樂死終身無憂煎我昔宰棠邑年少如任延君來
作交代見若平生懼受馬不數齒穿錢不算緡感君意
豪健使我心纏綿從此忘客主雲龍樂事偏有時我外
出歸家鼓喧闐問是何爲者君代張華筵子旗與子尾
兩室如一焉歷歷事雖往依依夢常牽今秋君病篤我
呼渡江船握手不能語猶問老母安遲君半日死補我
一面緣方知素心人永訣非偶然君家汾晉住旅櫬何

時還有妾未四十鬢髮垂雙肩有婿治喪事踈踏張空
拳未能計日後能無悲當前我亦六十叟海內無同官
知作幾時別老泪空涓涓

黃信生獨立圖

四瀆水獨流一月光獨吐只緣依傍空獨有萬萬古我
友信生子清才老吳楚瘦削若植鱗飄飄欲霞舉偶畫
獨立圖四顧無儕伍敢希魏裴俠高標立天府庶幾唐
杜陵蒼茫咏詩苦我亦孤詣人躑然手獨舞平生所知
交落落均堪數甘爲夔足一恥作晉耦五何時把臂行
全入無雙譜

秋蚊

白鳥秋何急營營若有尋負官衰世態刺客暮年心附
煖還依帳愁寒更苦吟憐他小蟲豸也有去來今

偶成

白髮對花落悄然心不安未知來歲發可有老夫看欲
掃且停帚將歸更繞欄多情蜂與蝶伴我忍春寒

病足

明明聖賢途見到行不到誰知大體然小體亦相效右
足忽病瘡左足徒踰蹕一柱雖支梁孤槩難移棹望山
無時登聞酒先辭召想栽花近床妬殺竿垂釣豈無張
湯摩難學漢王跳未免山魘欺兼招跛鼈弔我道身何
衰六十先已耄蕩蕩天門開捷足讓年少平平王路寬

小倉山房 卷二十一
蹀躞疑陷淖羨彼蟲豸行升堂還入奧輸他落葉飛隨
風尙騰趙一履一騎腓將爲管子笑我謂子胡然用短
最扼要兀者古王駟喪足乃入道更有臙將軍斫白張
旗燾珠玉本無脛從從走燕趙何況我山翁高風原坐
嘯但宜卧惜惜不煩行僬僬借此自夷猶足疾奚須療
永斷沒階趨將母非禮蹈例可免送迎心堪釋煩躁靜
處光陰多閒中著作妙弟子自來學先生免徃教雖非
希哲貴居家時乘轎或惹美人憐碧玉回身抱

癬

頑癬如頑妻一來不可黜附體二十年爬搔晝夜徹病
類伯牛癩形同豫讓漆其性更陰狠乘隙乃作賊不生
面目間似畏見日月好據尻腫罅蟻蚤所不屑如草多
蔓延如蠶慣齧齧非仇苦糾纏非親強狎暱知我肅太
賓故意將肘掣俾縮做禪中王猛如捫虱有時卧沓衾
蠕蠕作蟲嚙嬲我侍者勞麻姑爪盡折我怒攻討之克
敵占見血初將礬石敷繼用毒藥熨痛極癢始差東平
西又凸小敗勢轉張暫稀發愈密神農藥不靈扁鵲醫
無術有客爲我言除惡何須絕人生食烟火疇能免濕
熱借彼作消導亦足免他疾譬如大厦居不必熏鼠穴
又如護水隄區瀦任宣洩矧是皮膚累並非心腹孽何
不包容之聽其自生滅我亦無奈何姑且聽客說甘作
痕痕人永少清淨日吾及汝偕亡一笑萬事畢

竹林寺

晚過竹林寺斜陽屋角沉風燈紅不定烟柳綠彌深僧
少磬常寂樹多晴亦陰耳根疑佛語鈴鐸有清音

平生觀書必摘錄之歲月既多卷頁繁重存棄兩
難感而賦詩

愛書故看書看罷書已走何以強留之廢心轉用手悠
悠三十年兀兀極邪西食鷄必取跖占星常斷卦有如
養蜜蜂百花無不有但可備采掇不必計用否又如大
官庖甘苦皆上口旨蓄盈萬千搜牢費八九一朝卷束
之凄然傷白首欲作楹下藏未必六寸守欲當堯典殉
空與骨俱朽不如問蒼蒼教吾傳某某

淮上權使伊簾也先生手書索枚全集先生乃故

長官李觀察永標甥也銜恩感舊奉寄二章

淮北牙旗捲朔風淮南招隱到山中卅年名性能知我

一代風騷信屬公公杜中有三十年來久欽學業之語手荅長箋揮倚馬

心憐小技問雕蟲緣何卿月當天滿偏焰幽棲草一叢

御李當年有舊恩曾持手板謁清塵誰知屏後窺探客

卽是公云曾在李公屏後見枚天家柱石臣老去自憐知己盡書

來重見愛才真何當遠泛清江棹白髮追陪話夙因

題陳省齊太守雲溪書屋圖

憶作麤官日曾經侍大賢棄尊爭往返簿領共周旋彼
此形骸忘官階禮數捐先生方綰綬賤子早歸田分于

情猶摯推襟意更憐簫聲朝置酒燭影夜題箋九月花
黃日三春雨細天携孫入山裡問字到堂前玉貌驚雕
武鴻才愛服虔餘情忝媒妁納幣聘嬋娟公長孫熙娶于錢氏枚爲
執冉冉雲烟度悠悠歲月遷量移山左地幸權水衡錢
語笑風次斷音書雁代傳卅年如夢過八秩未華顛剩
有丹青畫能描陸地仙庚桑風拂拂丙舍樹連連童子
將書立閒鷗倚檻眠貌如松鶴健瞳映水雲鮮故吏雖
衰矣披圖尙宛然願言打雙槳來訪五湖烟

覺衰

甚矣吾衰百不如齒牙零落髻毛疎花間愛曳隨身杖
燈下愁看小字書偏把事忘應記處慣教氣損劇談餘
須知逝者如斯耳老說聰強揔是虛

挽梅式菴

讀史研經四十春終嫌竹素少傳真九原此去無他樂
看見古來無限人

題畫

村落晚晴天桃花映水鮮牧童何處去牛背一鷗眠

謝胡誠齋觀察送瓜

綠沉瓜向草廬投捧得雕盤暑漸收碧玉幾團隨手削
紅霞一嚼滿庭秋分明西域來佳種慚愧東陵作故侯
願着荷衣捧仙果南皮池上奉清遊

再謝賜鮮荔枝

投瓜慙未報瓊瑤仙荔重教擘絳綃香色品來真一絕
海風吹未過三朝形同玉李膚尤嫩味借甘棠露不消
欲假公恩咏嘉樹試將仙核種山椒

養馬圖

養馬真全養士情香蕤供奉要分明一挑芻草三升豆
莫想神龍輕死生

十二月十五夜

沉沉更鼓急漸漸人聲絕吹燈牕更明月照一天雪

永福菴贈餐薄上人

山髻當牕滿松釵落袖輕老僧雖寂寞歸有一花迎

元旦

暉暉晴日表元辰漸漸柴門草色新閨歲梅花猶蓓蕾
通宵燭影尙橫陳公然白髮三朝客又領東風一日春
未賀賓朋先賀我堂前九十四齡親

喜魚門主事改官編修

一行丹詔下蘭臺海內風人笑口開爭說聖朝能
得士此官終見此人來

明中官降暗中遷天眼遲開四十年可似修真老張果
白頭才許作雲仙

笑問花磚影若何當年老子也婆娑忝爲先輩無多日
只隔迢迢十六科

荅大廷尉王蘭泉先生見寄詩扇

有序

先生名昶以吏部郎從阿將軍桂征金川同行
者趙文哲等俱歿于陣而先生獨奏凱旋論功

擢廷尉

誰佐平西第一功漢家庭尉重于公心憐舊雨貽紈扇
身出重圍感塞翁皓首軍機雙鬢雪高冠孔翠一翎風
遙知清瘦書生貌畫上凌烟便不同公以軍功賜孔雀翎圖形內府
殺賊金川當壯遊寶刀光裡萬豺豕雲山看到中華外
鼓角聽殘白帝秋半夜天星擢上將一軍風鶴起深愁
斯時代作孤臣想可有生還兩字不

且喜謀參李藥師生擒頡利返牙旗手書露布三邊讀
甲洗銀河萬馬知草檄已完孫楚事從軍應賦仲宣詩

何當洗耳華堂上聽說蠻溪苦鬪時

故人踪跡久離羣記否蕭齋酒半醺打槳舟忘桃葉迎
謂贈婢事磨崖字許小山分公鑄澄碧泉三思量鴻爪痕常
在傳說鶯遷信屢聞此後袁絲休惜別舉頭天上見卿

雲

讀道古堂集弔杭堇浦先生

平子才華賦兩京禮堂經義屬康成殿前放膽陳封事
海內甘心奉盛名一代官多徵辟少百年人重甲科輕
等身著作分明在可學歐公畏後生

歸隱湖山笑眼開誰知方朔歲星哉橫衝一世談天口
生就千秋數典才萬卷堆中碁局響三貂座上緼袍來

傷心此日風流盡江左靈光半夜臺

新正十日聞陶衡川孝廉之訃因思去年秦學士
礪泉梅式菴公子皆先後委化曹子桓云旣傷逝
者行自念也感賦一詩

一度秋風一逝波故人零落漸無多蒼天留我忙何事
日日桓伊唱挽歌

卽事

盆梅三株開滿房主人坐對心相忘偶然入內女兒怪
問爺何故衣裳香

寄江橙里主人借西磧山莊

當年曾被梅花引得到蓬萊最上巔今日將身棲下界
不禁清夢繞諸天

幸喜劉盧仙籍通舊相知是主人翁數行代勒姬媵記
也算磨崖第一功

主人命作西磧山莊記

三年聞說無人住綠滿空庭草未除我與閒鷗謀拜賜
水邊林下各分居

平生踪跡等搏沙料理雲烟頗自夸豫辦青溪苕葉帚
爲君石上掃殘花

騰嘯臺高萬嶺低獨眠人往怕孤悽未知紫府清巖地
可許劉綱挈小妻

伯通廡下暫棲遲敢學鷓鴣占一枝幾朶雲生幾楓落
定書花葉報君知

不借荊州借太湖買山有券借山無遙知三萬六千頃
一笑公然付老夫

哭陳省齋太守

八旬解組住鴛湖書屋雲溪有畫圖忽報神仙歸碧落
應教故吏服衰纁文孫才大功名晚謂梅太守官清老
興孤白髮參軍倍悽絕同僚海內一人無

題亡友梅式菴畫冊

數盡天難問才高藝自精斯人雖萎謝遺墨尚縱橫氣
得山川秀神含水木清休言小遊戲卽此見生平
識面長安日題襟白下時卅年如昨耳一別竟何之絕
好佳公子居然老畫師相知慙未盡頭白泣袁絲

德定圃先生卸漕帥事巡撫閩中與夫人雙壽索

詩

蕭何轉漕卸雙旌常袞頌春到越城半壁東南恩已徧
六旬花甲歲初更文章自得中和氣瀟灑兼辭幹濟名
此日軍門牙纛靜花苗螺女盡懽聲

憶昔追隨步木天一番春夢尙依然後生許我稱名士

前輩驚公更少年

在翰林時枚年二十一

閩闔門多鸞振翼

公歷內務府國子監吏兵工各衙門

溪山秋老鶴歸田蓬萊久別還相認

邂逅揚州又拍肩

丁丑公扈

行宮門外

儂家仲氏學吹篴也領春風侍絳帷玉鑑冰衡無遁物
珊瑚鐵網有高枝生徒負笈來千里兄弟焚香禮一師

常共子由聽雨坐歐陽門下說恩知

家弟樹癸未春
闢出公門下

徵詩箋到士林聞爭寫瑤池琬琰文共仰金仙飄綠髮
更看王母擁紅雲花開並蒂春難老酒進雙卮飲易醺
慙愧袁絲相隔遠吹簫輸與武夷君

六月菊

寒菊公然冒暑黃蒼蠅側翅遠相望東籬共訝西風早
秋土偏貪夏日長試把一燈來焰影焉知六月不飛霜
數枝冷艷當階立愁殺紅蓮不敢香

題夏山圖贈曹谷堂

夏山有景奇如許畫家有手誰能取董生北苑貌得之
藏在人間忽飛舉畫雖飛人能摹徐王二手成此圖我

當嚴冬雪後展卷看宛若四五月行深山叢叢萬木
雨欲滴莽莽一氣雲相連扁舟何處來盪漾迷濛天牧
童驅黃牛後先分著鞭板橋有人烟中語茅屋幾椽花
外偏遠望層巒疊嶂不知幾千里對之但覺飛濤空翠
生衣問據云臨摹此本已第七墨彩淋漓猶繞筆董生
委化雖千年紙上招呼如欲出谷堂先生信解人上手
當作共球珍當頭一跋妙絕倫更索我詩張其軍我見
此本勝見真恍如身到桃花源急驅烟墨題數言願君
傳之世世萬子孫

棊城課士圖爲盧太守存齋題

君之外舅古賢者曾以封章薦終賈

廣西撫
軍金公

君之先人

撫我鄉

諱焯

至今遺愛民難忘爾我通家未侔面四十

年來才一見往事都從夢裡談回頭幾度滄桑變授我
棊城課士圖命題詩句當笙竽開看一片青衿色桃李
公門萬萬株泮宮峩峩起兩廡羅羅疎干旌來子子儼
從走踈踈圉人繫其馬校官捋其鬚或執經以請益或
握管而躊躕更有嬰媿小公子手持如意來嬉娛鱣堂
講罷高揚觶江風遠送斜陽至使君欲起尙留連恐有
秀才來問字此事依稀十數年使君五馬賦鶯遷詣學
雖無何武駕聞歌還說子游賢我亦當年一貧士蒙師
教育皆如此白首難忘知已恩長安寄信訪兒孫今朝
得遇師門婿不覺淋浪涕如雨宛然舊院一蒼頭忽見
小郎如見主更喜憐才意思同丹青畫出舊家風他年
官到中丞日定有聲名繼兩公

哭程荆南明府

望見金焦眼便紅哭君兩世半年中

尊人春間先去世

詩才一

代清無敵德政三湘感未終宦海波濤天外落騷壇旗
幟眼前空去時畧說西歸意五百袈裟候下風

歿時見五百僧

相迎

屈指交情十七年同吟同醉更同眠風窻折竹疑聽雪
月夜乘槎欲上天無盡燈常明綺席有情花亦乞吟箋
如何小別橫塘雨一隔音塵便杳然

題袁蕙纒南湖圖

吾宗有賢者一見使人古學爲漢唐文筆力如牛弩屢
困公車試再上慙不武示我南湖圖其中有衡宇將終
老于斯蕭然樂環堵我偶展丹青恍若遊元圃蒼蒼遠
峰蹲落落長松舞閒倚石爲梁靜看雲出府花影人過
橋水聲舟蕩櫓平生未讀書此間真可補直是羲軒民
豈徒羊求伍非飲山泉甘那知井泉苦寄語樵父仙我
來風莫阻擬到溪流邊同把游魚數

七月二十三日阿遲生

六十兒生太覺遲卽將遲字喚吾兒高祿久祀心都倦
燕姑初來夢恰奇鍾姬入門前一日悔賣琴書還想贖
怕看湯餅轉生悲萱堂握手彌留際猶問懸弧是幾時

海內爭傳伯道名今朝前雪賦添丁長成未必衰翁見
有後姑教薄俗聽老樹着花秋色好餘霞返焰暮山青
豆盧寧傳分明在合授雙雙姓各一經

尹三公子璞齋觀察蕪湖相晤白門喜而有贈

折花使者遞名箋知道通家見有緣蒔花人李姓者先
三日傳到名紙

廿載青溪成契濶一朝丹詔許旬宣渡江歷歷前生

夢到眼依依故國天聽得耆民私地說當時公子最翩

翩

觀察晨趨帥府忙軍人一半喚三郎竭來門外聽官鼓
恍惚兒時上學堂洗硯池應留墨漬題墻字可剩偏旁
西園舊是君家物早晚還君望正長

相公門下老袁絲也算甘棠樹一枝沿路先教探安否
升堂各自認鬚眉炤來悲喜燈俱笑說到滄桑酒不辭
重入桃源莫相訝仙山樓閣倍參差

此去牙旂鎮上游天門山色捲簾收擬招荆樹來千里

更奉慈雲擁八騶

君奏請六弟似村奉太夫人就養

訪我定搖雙槳月

開關先放一輪秋何時得遂詩人志把筆同登太白樓

附觀察和韻詩

名園粉壁舊題箋宦蹟重尋信夙緣載酒居然同杜
牧趨庭猶記認彭宣燈明水榭三更夜桂放秦淮八
月天策馬來朝還過訪蔚藍深處影聯翩

買得青山日日忙江南遊客舊清郎英雄晚計成芳

墅巖壑遺身戀草堂解組半生花遶座校書他日子
隨旁我來正值懸弧候莫嘆如絲鬢髮長

遙從山館寫烏絲似折梅花贈遠枝千里縱如同握
手一尊那得共開眉官麤翻見身多累親老難言祿
易辭極目吳頭與楚尾嵐光隱隱水差差

石頭城畔溯前遊到處風光入眼收畫舫西園慙倒
屐油幢北府悵鳴騶重來頓覺河山異高宴空
木秋幸有故人袁淑在朗吟同上謝公樓

甘露寺感舊呈夢樓主人

并序

已未冬予乞假歸娶路過京口值商寶意前輩
爲郡中司馬命公子某陪遊甘露寺今四十年

矣中秋前一日王夢樓侍講招飲此間追憶前
遊悽然有作

記得當年此地經雪花寒重錦袍輕酒邊緣
鬢初垂影山上蒼松半未生卅載韶光春易過
一條狹磴老難行憑闌暗轉衷腸事江水無情浪有聲

木天署裡老詩翁曾縮仙符碧海東要把江山付詞客
特教公子伴花驄西州賓從人重到北海葵尊事已空
難得多情王太守開筵重與醉西風

舟過平望訪張看雲居士不知其已亡也留詩哭
之

滿擬故人在停舟問起居誰知雙目瞶已是一年餘總

帳風前卷殘花雨後疎九原知我到悲喜定何如

弱冠長安遇雞壇第七人

丙辰在李玉洲先生家與曹麟書沈椒園諸公結吟社

各彈遊子淚全惜客中身脫手一錢贈分甘半盞春至
今回首憶風義感雷陳

鶯脰湖邊屋高樓見水光卅年三領畧萬事幾滄桑棋
罷柯雖爛舟移壑未藏請看鄴侯架堆積尙琳琅

桑榆收晚景作客古揚州畫重連城壁詩輕萬戶侯看
花醉金谷築舍老菟裘華表竟應在年年化鶴遊

松下作

小住倉山畔悠悠三十春蒼松都已老何況種松人

梅

正月東風柳未芽一庭梅影雪橫斜重他身分緣何事
只爲能開冷處花

讀淮陰侯傳

滅楚身提百萬師知公含笑了無奇英雄第一開心事
撒手千金報德時

老來

老來不肯落言詮一月詩才一兩篇我不覓詩詩覓我
始知天籟本天然

帆

一葉帆高掛千舡水作聲靜聞舟子唱猛見浪花迎張
處休教滿收時自覺輕從來人失足轉在順風行

雨中志感

徹夜淋浪屋瓦鳴雨如相約赴清明山中易放惟花柳
世上難收是姓名月桂根高終不落沙鷗船過也虛驚
放翁自有安身法一個齋顏心太平

花朝日戲諸姬

花朝時節祭花神片片紅羅縛樹身爭獻百花生日酒
不知誰是似花人

阻風京口

已出三江口難拋百丈牽一帆如懶婦終日但高眠

詩再遊心再化

第二泉

清絕形難比源深取不窮知名不知味來往一杯同

雨夜泊嘉禾訪陳梅岑秀才次日喜晴全遊烟雨

樓三塔寺

久輟牙琴感索居一朝親叩子雲廬船衝急雨剛停槳
手握詩人便起予嬌女抱來冰雪似華堂指點火焚餘
卅年世好三年別說到深情海不如
相約鴛湖打槳行萬金難買此宵晴一樓烟雨人初到
三塔風光水正生桃尚留花待殘客柳如招我過清明
白頭愛話悲懽事紅盡桅燈未入城

入武林城作

肩輿望見聖湖烟觸目情生故國天不是還鄉是尋夢
一邱一壑總纏綿

雖名故土全無屋且喜殘春尚有花笑挈姬人住僧舍
不成孤客不成家

安排遊計首頻搔客裡光陰怕寂寥晴日尋山雨尋客
不教孤負一春宵

成見年來久不存麻鞋隨處踏芳塵朱門蓬戶無分別
只要能容自在身

西湖德生菴小住

遊山如讀書少年力不努垂老意愴然亟亟還思補我

本西湖人久離西湖土當其家居時頗爲一城阻及乎
宦遊後更覺相思苦今乃白頭來卜寓在湖所有如久
饑人見物思盡取又如矍鑠翁餘勇必盡賈朝將湖烟
吞暮把湖月吐行湖一枝筇盪湖兩枝櫓湖意亦懽迎
浪花如雪舞

月夜斷橋獨坐

一輪月一個我半夜斷橋相對坐湖光照月月增清月
色當湖湖更大滿湖烟起將山烝山容若睡喚不應我
亦下橋覓歸路緊認僧菴一點燈

孤山

一山自起伏不藉羣山扶既不傍城郭又獨占裡湖頗
似臯夔世別有巢由徒宜乎數千年獨居處士遺自呼
梅爲妻自畜鶴作孥雖捐茂陵稿恰修薦賢書倘非際
明盛寧肯効區區我攜影獨來一僮一僕無問我胡爲
然也學孤山孤

登六和塔

一塔表江清觚稜夕照明盤旋看下界絕頂見平生乍
上微嫌黑彌高轉不驚縱教吹落地也有半年程

遊紫雲金鼓諸洞

看山恃一筇有境我必到垂老戒在得山靈莫相笑初
尋紫雲幽再探金鼓奧潄潄石乳滴蹠蹠仙鼠跳古藤
高挈空丹厓低設竈穴深不可測誘我往前導忽然一

小倉山房
卷二十一
梁橫故意將人拗喜無元霜侵永辭白日炤偉哉真宰
心戛戛喜獨造鬪險乃出奇因空始見妙寄語世間人
頑石猶有竅

謁岳王墓作十五絕句

靈旗風捲陣雲涼。萬里長城一夜霜。天意小朝廷已定。
那容公作郭汾陽。
遠寄金環望九哥。一朝兵到又回戈。定知五國城中淚
更比朱仙鎮上多。
一個西湖換兩宮。靖康小雅唱雍雍。憐他絕代英雄將
爭不遲生付孝宗。
軍令如山鳥不譁。黑風龍虎盡呼爺。自然慈聖還宮日

苦向官家問岳家

歲歲君臣拜詔書。南朝可謂有人無。看燒石勒求和幣
司馬家兒是丈夫。

要盟結贊屢彎弓。翻錄和戎魏絳功。老住迷樓人不醒
趙家天子可憐蟲。

小校桓桓道姓施。湧金門外有專祠。雄心似出將軍上
不斬金人斬太師。

要結中朝絳灌懼。分將戰艦贈同官。韓王心喜張王惱
始信人間送禮難。

允升一疏奏楓宸。與汝何干竟殺身。擬把東廂添配享
黃金鑄個布衣人。

華表凌霄落照遲。一朝孤憤萬年知。梨花寒食燒香女。
織手都來折檜枝。不依古法但橫行。自有雲雷繞膝生。
我論文章公論戰。千秋一樣鬪心兵。五十三人命已休。
秦城王氣忽然收。教渠暫緩須臾死。那數中原劉彥游。
身後何曾有定論。金陀野史仗文孫。紫陽譚語瓊山繼。
燭火無光照覆盆。恰有狐疑問殿前。周歎入廟竟身顛。
與駢敵怨分明在。只恐當年事偶然。江山也要偉人扶。
神化丹青卽畫圖。賴有岳于雙少保。人間才覺重西湖。

孫秀姑墓

我年八歲才讀書。大母爲言孫秀姑。今年六十偶行路。
得見秀姑湖上墓。秀姑生長貧家裏。髮鬢便行拜時禮。
郎小從師赴學堂。姑衰抱病居田里。隣家嚴虎里中豪。
望見嬋娟眼欲燒。初將軟語投梭誘。繼喚妖童作餌挑。
女兒自是女貞木。豈許纖埃污白玉。已歌暮棘刺陳佗。
重上輜車詈董卓。匪人窮怒轉成羞。道不穿墉誓不休。
朝擲餅金窺浴所。暮隨鴟吻望墻頭。秀姑膽小空房怯。
生恐雄狐勢漸逼。皎月當天自有光。紅蘭拒雪愁無力。
層層縫裹舊衣裳。訣別慈姑掩洞房。一夕伯姬雖命絕。

十旬劉表尙屍香官吏聞之愧無狀急擒鼠輩尸諸巷
扁表巍峩北闕來風雲蕭瑟西湖塋此事茫茫八十春
當時碑碣漸沉淪寄言當事徵文獻且莫修培蘇小墳
時西湖修蘇小墳不知小墳在嘉興見武林舊志

三月四日項金門秀才招同吳西林汪槐堂諸公
補修禊詩得春字

卅年不見故園春一夕南還得主人佳節已過修禊日
華堂還召苦吟身酒邊分韻詩隨意花下談禪鳥問津
西林夢樓席間談禪人多避席恰好山陰儂買棹蘭亭方欲訪前因

贈金門

之子武林秀相逢喜不禁惜春常速客得句便題襟雅
抱推袁意難忘說項心爲君歸緩緩湖上落花深

雲棲寺

竹密不見天竹盡乃見寺相傳蓮池師于此建初地匪
徒參高禪亦且見小智矮屋難搖風戒嚴易蔽事眷屬
許同宿貴賤無二味更有終老堂窮氓隨所寄一切部
署法井井有條例宜乎十方民甘心多布施禽學梵貝
音草帶靈檀氣我亦如閒雲一宿了來意

放生所

天性人爲貴庖犧見理明傷人不問馬宣尼分重輕魚
鼈稱咸若未必非杯羹迺哉西方教兼愛徒涇涇人物
混爲一不界濁與清我來放生所刺目尤心驚雞餓且

啄距牛呿半陷阮頑鷺瘦于雀仙鹿穢若蠅是謂違物
性。桎。梏。加。天。刑。放。乃。未。嘗。放。生。不。如。無。生。

見雨中喚渡者

船家鎮日喚人行雨後無人肯應聲載得白鷗三兩隻
水紅花處倍分明

贈撫軍王味陳先生

中丞家世重瑯琊浙水緣深兩建牙謝傅經綸多靜鎮
汾陽福力自豪華潮聲曉應千家笛燈影宵紅四壁花
豈獨惠民兼禮士四方名宿走雷車

曾蒙草奏牧秦郵回首恩門感未休

枚牧高郵先中丞所薦

一樣

憐才家法在卅年往事水東流星雲有耀能垂蔭蒲柳
將衰易感秋願得白頭還故里村村扶杖聽歌謳

清明

枝枝楊柳可憐生朶朶梨花笑不清四十年前舊遊客
故鄉今日過清明

月夜老姊兩姬挈阿遲泛舟西湖予亦追至孤山
小飲而返

門外一舟泊小僮偷掉之舉家遊西湖主人猶未知愛
茲明月光亦復呼舟往相逢孤山巔彼此各停漿酒家
未關門遣僕沽一壺空明水晶宮團團家慶圖小醉將
舟泊人生且行樂月照子若妻已成梅與鶴

題萬九沙先生小像

有序

先生諱經康熙戊辰翰林任學使罷官乾隆元年
召試鴻博以老疾辭全謝山作公車徵士錄海內
凡一百八十人序齒先生冠首枚署尾今年在杭
州其季子福持遺像索題

當年丹詔召耆英驥尾龍頭記得清未共殿前揮采
筆忽從畫裡見先生春風有影鬚眉在流水無聲歲月
更幸喜小同才絕世禮堂經學繼康成

淨慈寺回舟湖中風雨暴作

一角雷峰黑三潭雨忽狂小舟如鷁退高浪比人長荇
藻難援手蛟龍欲入艙倘非風少定幾作水仙王

施將軍廟

將軍名全以小校刺秦檜不克死

一德格天閣正新一刀殺賊乃有人敷天冤憤仗誰雪
殿前小校施將軍將軍煉心如煉鐵可惜荆軻疎劍術
事雖不了神鬼驚懸頭市上香三日當時元姦黨滿朝
縛虎如羊氣太驕忽然刀光狹路照太師頸上風蕭蕭
嗚呼三字獄兩宮駕總在將軍此刀下後代聞英風尙
且有興者君不見腦碎銅椎阿合馬

萬松書院

萬松環一嶺書院建其巔我昔來肄業弱冠方童顏當
時楊夫子經史腹便便門墻亦最盛濟濟羅諸賢我每
遇文戰徹夜窮鑽研至今咳唾處心血猶紅鮮何圖日

一瞬垂垂五十年先師墓木拱諸賢盡雲烟我來重過
此几席猶依然悞欲往學舍執卷趨師前昔也離家遠
廿里走僦僦今也升講堂一步一扶肩昔爲服子慎絳
帳時周旋今爲薊子訓摩挲銅狄仙逝者竟如斯能無
意自憐羨殺丹桂花無言但參天

偕阿遲上冢

周碎嬌兒索乳忙抱來學拜祖塋旁春風似解人間事
一縷香烟吹漸長

渡錢塘江

卅年前渡此江風白髮重來似夢中就使江神最强記
也難認得此衰翁

禹陵二十四韻

天地平成始皇王禪讓終一人生石紐萬古闢蠶叢玉
斗胸垂象金鞞耳啓聰尋書齋委宛受牒作司空地險
龍門鑿人功鳥道通爲魚援赤子幹蠱慰黃熊學裸姑
狗俗乘橐又轉蓬庚辰禽水怪豎亥步崆峒貳負甘雙
桔將軍號百蟲嘗聞下車泣忍過羽山東破石佳兒出
開山遁甲窮勤能師宰子威不赦防風息壤波全息扶
桑日更紅過門心淡泊造粉事朦朧鑄鼎神姦列遐方
玉帛同偶然巡越甸遽爾墜軒弓身自跳天上稗應塋
穴中葛紉烟露冷陽暝水雲空復土來蒼鳥南風送祝
融江山猶拱侍廟貌更穹隆真冷懷文命偏枯想聖躬

兩廂環岳牧九殿拜兒童窆石摩挲古衡碑刻劃工微
臣擎旨酒不敢獻元宮

蘭亭

爲有蘭亭序青山屬右軍清流猶映帶名士盡烟雲嘆
逝能無感論書孰與羣偶然數行字千古訟紛紛

王右軍祠

荒祠碑記永和年東晉衣冠尙宛然觴咏偶留修禊帖
安危能上會稽箋書名太重經綸掩兒輩分甘樂事偏
我欲奠公無別物一籠鵝放惠風天

西施廟

人去苧蘿空香烟恰未終死猶存越廟生可想吳宮溪

水浣紗影虛廊響屐風金錢輸一見交與守祠翁

傳說西施祀鑑湖一帆先自走菰蒲三千年後情如許
可是前生范大夫

石屋寺

怪石墜空天卧地猶露縫一手推可搖萬年吹不動石
旁有古寺栽栽紺殿垂終朝鐘鼓寂但見鳥雀窺肅愍

留手迹

寺有于肅愍手書

道迢三百秋問僧僧不知愈覺山中

幽西齋尤奇絕懸厓接屋瓦不敢開牕看亂山如走馬

吼山

山頂麥開花山腰石張口我舟昂然來直向口中走其
中別有天澄泓水百畝亦復構亭榭高下羅八九絕壁

摩蒼蒼似將長劍剖斜削爲鼉梁架空拖石紐偶然警
咳聲千山齊一吼水深試以篙不知有底否但見大魚
游吞餌幾吞手我遊山川多此景駭未有爲之泊舟看
自午直至酉

禹陵大松歌

我來禹陵見大松身橫九畝疑防風當日定爲蒼鳥種
後來不受秦王封扶桑遮日松遮雨各護神聖安元宮
旁有窆石形奇古堪與千年松作伍想見龍牽引綽時
呱呱后啓猶摩撫諸侯會葬紛來朝此松未必無枝條
蒼水使者來挂綠百蟲將軍不敢燒山風吹松作濤起
髣髴洪水聲滔滔我欲呼松問禹狀松不能言徒崛強
且折松枝滿載歸驚夸法物商周上

湖上襍詩

浮家泛宅幾回遷

先寓德生菴
再遷陳莊

遷得西湖到榻前從此

欄杆憑不了雨餘風定月明天

月明如水浸沙隄隄上游行一杖攜惹得家僮沒尋處
夜深孤坐斷橋西

桃花吹落杏難尋人爲來遲惜不禁我道此來遲更好
想花心比見花深

范公祠裡藕花居四十年前我讀書今日再來人不識
自家一步一躊躇

誰家愛唱玉玲瓏笛自西飄曲自東一夜蕩搖聲不定

知他船在水當中
飛飛小艇慣穿雲
傍曉招人到夕曛
底事游蜂頻繞漿
兒家衣是藕花熏
烟霞石屋兩平章
渡水穿花趁夕陽
萬片綠雲春一點
布裙紅出採茶娘
坐看陶莊瀑布飛
珠璣吹滿芰荷衣
痴心欲向山僧說
水不流還我不歸
遠望雲鬟意態佳
近前凝視眼頻開
豈知卽是我家婦
一笑各詢何處來
葛嶺花開二月天
遊人來往說神仙
老夫心與遊人異
不羨神仙羨少年

花神十二最清華
齊著雲裾踏雁沙
擬向江淹分彩筆
一章詩贈一枝花

冷泉亭上草如茵
鎮日看泉泉滿身
天竺過門偏不入
觀音應不惱詩人

鳳嶺高登演武臺
排衙石上大風來
錢王英武康王弱
一樣江山兩樣才

六陵何處認冬青
望帝魂歸淚欲零
偏有子規不解事
聲聲啼與岳王聽

山無佛像山才古
水有魚船水不幽
我愛九溪十八澗
把人引去又勾留

金泥光閃梵王宮
簫鼓沿隄鬪晚風
從古繁華春世界

朝陽不及夕陽紅

隻鷄斗酒淚潸潸師友墳前薦一餐只有杜鵑心似我

滿山紅與故人看

桑女留儂住小車春蠶食葉響沙沙一甌水白茶如雪

足抵人間七品家

金史七品官才許飲茶

遊遍山南與水南就中何處最心貪為他幽絕遊難盡

兩度呼車別理菴

丁丁鑿石嶺雲開魚鳥咸知 萬歲來世界昇平山水

福五年一度換樓臺

春宵知是可憐宵柳下呼舟月下搖消受水晶宮世界

四更猶有滿湖簫

贈轉運陳葯洲先生

隱隱金鉦雲外飄紅旗影共酒旗招為憐碧草開三徑

特訪幽人到六橋僧換袈裟迎上客吏隨啼鳥報花朝

多公心似西湖月肯向禪樓照寂寥

南衙文宴做學愚爭誦仙郎館課詩

公子 庶常 官 入席東

南名士滿通家姓氏小君知

夫人為李存存先生之女 見枚名紙驚日此五十年

前先君門下士也

庭無襍草香生早座有歌童客散遲更許劉

楨作平視繡帷新得好瓊枝

謝趙耘菘觀察見訪湖上兼題其所著甌北集

乍投名紙已心驚再讀新詩字字清願見已經過半世

深談爭不到三更花開錦塢登樓宴竹滿雲樓借馬行

待到此間才抗手西湖天爲兩人生
集如金海自雕搜滿紙風聲筆未休生面果然開一代
古人原不占千秋交非同調情難密官到殘棋局可收
我倘渡江雙槳便定來甌北捉閒鷗

大姊索詩

六旬誰把小名呼阿姊還能認故吾見面恍疑慈母在
徐行全賴外孫扶名阿常當前共坐人如夢此後重逢
事恐無留住白頭談舊話千金一刻對西湖

四月十一夜月色小明步往泊鷗莊與陶篁村論
詩次日連雨方喜前夜之不負也

見月思幽人踏月走林莽柴門風竹喧未撞已聞響主
人卧而起枕痕猶在額剪燭哦新詩忘言契真賞訝我
月未圓胡爲急見訪我道來日難陰雨或者倘別後果
連陰回首成惘惘黑雲半遮渡急浪欲沉槩枯坐湖樓
中翻把前日想豈徒判鴻溝直欲分天壤嘆息月一輪
消受不能強何況行樂處得往宜速往

春草

離離春草遍山中寂寂飛香過澗東儘有靈根堪濟世
無人來採自搖風

訪柴東升墓不得

當年曾附李膺舟全到滕王閣上遊一路聯吟春夢在
百年再見此生休浮家聞說居東粵歸骨何時葬首邱

斗酒隻雞無處薦，腹猶未痛淚先流。

西湖小竹枝詞

妾在湖上居，郎往城中宿。半夜念郎寒，始覺城門惡。
蠶絲難上手，蛛絲易惹人。蛛絲吹即斷，蠶絲永着身。
雨餘紅意斂，風定黛痕長。妾請學西湖，今朝是淡粧。
朝喚岳墳前，晚喚茅家埠。不知相思寬，船家可能渡。
遠遠韜光磬，聲聲淨慈鐘。鴛鴦聽不得，飛上北高峰。

與嚴立堂諸公湖樓小集題折花圖贈高校書

先從畫裡認真真，再向風前見洛神。真個嬋娟人絕代，
桃花顏色柳花身。

定情早服黃昏散，張飲重陳窈窕湯。底事兒家姓高氏，

想因行雨過高唐。

膩粉輕雲一色寒，湖山須對美人看。漁翁遠望不相識，
只道高樓賞牡丹。

贈錢竹初明府

早窺叔寶便心傾，廿載重逢似隔生。共惜官階甘小隱，
誰知詩律等長城。梅花最近仙標格，醇酒還輸玉性情。
聽管迎 鑿書畫事所司終竟比人清。

賜我青葉曲數行，故人顏色焰湖光。深談合拍各雙笑，
招飲隔城時一觴。隄上花飛春欲去，篋中扇掩字猶香。
期君大雅扶輪意，好繼賢兄白侍郎。

連日

連日稱觴名故人滄桑往事說津津歸來我卽遼東鶴
何必他年有化身

諸姨姊妹盡來過白髮飄蕭半阿婆挈女拖孫燈下坐
大家還記乳名多

恩酬一飯意忡忡敢向淮陰拜下風只要此心長不昧
千金原與一金同

余將返金陵行有日矣葯洲轉運招全王夢樓探
花金柘田狀元集一分屋題唐子畏夜堂賦別圖

遊子還鄉難久住朝朝泥飲親朋處轉運多情更愛才
一車載入南衙去南衙水竹最清華燕寢香生雨後花

銀燭光中三雅滿金鰲頂上二仙譚入門先問陳蕃榻
免隔重城愁鎖鑰賜來半臂護春寒乞得新茶解消渴

文房張眼盡琳瑯就裡尤珍古錦囊匏菴首唱唐生畫
都爲江淹別夜堂春盤獸炭詩紛列鳳翥鴻驚字奇絕

一夕揮毫事偶然千秋動色嗟神物我亦階前拜別身
披圖展卷易傷神請留鴻爪將飛跡記取龍華會上人

留別杭州故人四首

滿耳鄉音聽未終東關行李又匆匆孔僖久已官臨晉
頰上無由返醉翁此日花間送殘客明朝天外望諸公
回頭多少酣嬉事交與湖樓一夜風

巾車踏遍九州塵到底吾鄉意氣真入郡未爲投刺客
敲門先有送詩人士將皇甫呼前輩官忘陶潛是部民

公席間諸太守推子首坐招飲一宵三四處擬分身醉武林春

江頭久已買歸舸自改行期自解嚙白髮牽衣諸姊妹
青燈投轄舊漁樵千山幸已都扶杖一事猶差未看潮

暗裡不禁衰淚落兒時同學已全凋
諸公餞我莫留連我道重來只隔年擬率兒童迎聖

駕兼看金碧耀諸天遊山也有前生福結伴誰為陸地
仙寄語項斯休忘約天台早為買吟鞭金門約遊天台

烟景

天然烟景足清幽底事齊梁鬧不休文士鑄碑僧鑿佛
萬山無語一齊愁

京口卽事

舟輕風太大愈順愈難行急向金山汨已聞桅折聲
方愁三日泊忽又一帆開任汝聰明極天心那可猜

京口遇王蘭泉廷尉舟中見贈四章卽如其數荅之

廿載分襟感昔遊一朝京口竟全舟金山綺麗焦山冷
頗似尊前兩白頭

謝公陶寫客中情流管清絲夜不停為道何戡年牛老
不宜相見只宜聽

水牕倚醉便揮毫四首詩成調最高想見金川磨盾日
飛書羽檄用枚臯

不載楊枝載桂枝折花時是散花時為儂寄語司關者

敝履遺簪有所思

子以桂郎薦淮關權使君為載往

乳媪姚氏挽詞

阿如乳媪姚氏在余家十一年頗貞靜今年過

吳江為小奴擔水其夫疑之媪怒投水死

防妻李益本模糊李下瓜田孰辨誣難事世間惟有死
竟將此事曉兒夫

左家嬌女嬖媿日曾受斯人乳哺恩今日一棺吳下掩
教他剪紙與招魂

再題第二泉

不似中冷遠莫求不今廬瀑占高頭出山不遠濟人便
最好人間第二流

寄懷梁山舟侍講

早辭金紫昵烟霞忘却蕭曹是世家一飯矜嚴常選客

半生孤冷不宜花每聞逸事多風義君子師門友相別

經年感髯華難得清明好時節忽逢舊雨試新茶

墨譜牙章手自鐫寓言詩寄反游仙君有反游仙十三首談禪不

落三乘後作楷能追兩晉前大小冠同杜子夏子一冠

人多笑之及見短長亭送謝臨川別來又覺秋風起回

首湖樓一黯然

寄懷王夢樓太守

未踏金鰲頂上行中華戒外早知名君先到琉球出疆

海水橫身過入夢宮花繞筆生才子中年多學道仙人

家法愛吹笙騷壇旗幟張多少我覺王維是正聲
代寫吟箋代整裝多君處處作津梁高霞得月方成彩
幽草無風敢自香李翰文枯奏音樂浪仙詩就獻空王
關心手撰鈞天曲歌到雲璈第幾章

兩江節相高文端公挽詞

一輪卿月墜烟波易簀心驚瓠子歌方喜君恩深北

闕豈知臣力盡南河

公薨于工所

春風自向甘棠暖冬日其

如夕照何此去公應不寂寞臯夔賢相九原多

卅年門館受恩身擡舉烟雲意最真頻把參苓遺老母
幾番絲竹宴騷人南衙語笑春雖遠小札寒暄墨尙新
料得奇章憐杜牧他生還許吐車茵

二月中似村公子過白下值予遊杭州不獲相見

留書而去端陽後予還山中賦詩招之并柬其兄

璞齋觀察

久別不圖君北至乍來偏值我南歸空留案上仙書在
尙記江頭別淚揮春夢過時蝴蝶老好風吹處春令飛
相期早踐山中約莫負衰翁掃釣磯

余續夷堅志未成到杭州得逸事百餘條賦詩志

喜

老去全無記事珠戲將小說志虞初徐鉉懸賞東坡索
載得杭州鬼一車

贈鍾山書院山長錢辛楣先生

不赴蘭臺赴石城經師我亦得康成卜居擬造東西屋
鐘叩時聞大小鳴滄海水原通碧落隣家燈可借餘明
如何欲唱思歸引失學先教一叟驚

喜似村至

仙舟重訪武陵津雞犬欣欣迎水濱三徑已非前院落
六郎還是舊丰神詩箋壁上多陳迹僮僕階前少故人
知否桃花怨公子負他一十五年春

引君全到小蓬壺指認牕前樹幾株舊榻豈知今又坐
新廊可記昔猶無雙鶴爾我留私印畧瘦容顏在畫圖

一石印刻兩人姓名隨一處傷心君莫往相公遺墨滿
園雅集圖似村第四

紗廚

似村約爲平原十日之飲忽賢兄璞齋權安慶臬
使敦逼還署余不能留寄詩送別

添出一重別君來轉惱余萍蓬才抗手火急又回車公
子三千里衰翁六十餘欲知腸斷否但看鬢何如

難卜重逢日還思乍見時藕花江館月風竹夜牕詩舊
夢層層在輕雲冉冉移傷心杜陵叟泉路說交期

蘇州徐西圃居士招同翁東儒文學遊西洞庭同

宿石公山房作

雙槩出胥口洞庭秋始波水含天影盡山像物形多太湖

諸峯有龜魚
老鼠等名鳥駭初來客風留半謝荷到時紅日晚猶

有采菱歌

七十二芙蓉登臨先石公水聲山脚響霜影樹頭空峭
壁勢相倚冷花香未終湖光三萬頃搖蕩佛堂中

待月歸雲洞悠然水面來衆峰如白鶴一色上霜臺倚
檻沉吟久聞鐘緩步回枝枝松檜影明滅映蒼苔

主人徐孝穆雅意最殷勤感舊招黃髮尋幽入白雲與

高詩亂寫顏熱酒微醺他日留題處停毫尙待君

君代
余題

兩絕句于僧
壁余不知也

登飄渺峯

一峰橫一峰豎一峰一峰行不住行到前峰無可行疑
被輿夫負我上天去輿夫笑且言此是洞庭飄渺峰頭
最高處遙天四望青茫茫白波萬道搖眼光琉璃平鋪

大地沒炊烟幾點人家藏若非身來塵界外那知山在
水中央賴有舟楫功人世得相通桃源聞雞犬笠澤走
漁翁不然便是神山可望不可接千秋萬世誰到蓬萊
宮天公妬我來大風吹雨至車蓋墜復飛冠纓頸難繫
冷雲滿口嚙不及逼人純是蛟龍氣凜乎難久留自掉
烟中頭紫鯨不來黃鶴遠老夫行矣無夷猶風兮風兮
相吹知有因勸我莫作人間絕頂人

身在

身在雲中身不覺看雲還上最高峰誰知身已穿雲過
脚下雲鋪萬萬重

林屋洞

林屋山雖低一洞深不已我來入洞行山溜多泥滓初
入難伸眉再轉才舉趾板輿曳村童人卧作蛇徒一枝
蠟燭光萬點蝙蝠起照見蓮花垂石床滴石髓如讀禱
卦傳物物堪比擬更聞聲在空波濤撼兩耳恍疑青山
巔翻落太湖底急誦靈寶經遠尋龍威子其奈字一行
大書隔凡矣

伍員墓

一片巍峩土未平鴟夷浮處有佳城遠山雲外學華表
潮水壠前多怒聲慷慨報仇衰世事淒涼託子暮年情
祇今廟貌丹青在兩眼猶如盼越兵

消夏灣贈蔡生

灣尋消夏處舟泊蔡經家幽絕槐眉樹艷開湖日花水
羞菱角採火米爨烟斜惹得隣兒集鷺看遠客車

太湖歸舟遇風仍挈行李宿徐氏西齋題贈西圃
禮珍心梅三主人

五日乘槎泛仙島塵緣未斷心悄悄急圖歸計見星行
兩槳嘔啞趁清曉誰知風伯忽怒號強欲留賓相別嬾
軒然大波吞人面篙折篷掀桅木倒魚龍當客挾山飛
天地似盆盛水小衾裯沾濕類鮫綃鬢髮飄揚作蓬葆
舟師搖手再四言千金垂堂毋草草不如返旆學叔孫
切莫沉湘似屈老我無成見最心虛亦且貪遊愛眼飽
可行則行敢希聖於止知止豈輸鳥從諫如流急轉帆

平生萬事回頭早看山如理舊時書讀過重溫更覺好
蕭齋雖別再扣門陳榻猶懸休灑掃主人大喜帶笑迎
伯歌季舞爭相繞速啓西牕指示余七十二峰青未了

贈虎丘主人杜開周

前樓秋水後樓花社牧三生髯已華我學山塘好明月
中秋時節到君家

西隣借得好樓臺怪底軒窗面面開風送衣香廊響屐
水邊時有麗人來

輕舟遠泛洞庭烟八日歸來秋滿天丹桂已殘香未散
一堆黃雪小牕前

相知已是廿年餘感舊難忘見面初同向風塵識豪傑

梁溪還有老尚書

謂拙修宗伯

余不喜陸行而渡江屢遭大風吟詩自慰

半世不知險歸舟又蕩公篷欹多漏雨帆破不兜風枕
倚秋江上詩吟大浪中沙禽能識我定是信天翁

寄懷錢璵沙方伯予告歸里

屏藩官職古稀年九十慈親人聖主憐子舍未伸烏鳥
志君恩許賦白華篇萊衣久舞宮袍淡孟筭重嘗野

味鮮不負故人期望意果然平地作神仙

公未歸前半
年余有札寄

云何不捨格天之事業
來作平地之神仙乎

養堂新築小蓬壺水榭風廊似畫圖伴客一庭惟古木
離家三里卽西湖書聲到耳聽兒讀花影隨身當婢扶

問捧彈章九天上驚寃還到夢中無公會劾黃太保

千齡會上酒盈卮八首吟成絕妙詞福壽能兼還有母
性情以外本無詩東山絲竹供陶寫西浙文章仗主持
可惜超超元妙處靈犀一點少人知

景龍人散巨山存送抱推襟老弟昆卅載閒居輸我早
一科前輩讓公尊雞壇零落人何在銅狄摩挲手尚溫
長願白頭兩宮女各談天寶也消冤

瘧

歸自吳門乍泊舟忽然瘧鬼又勾留衰年一病先防死
騷客三生最怕秋半老楊枝無可遣新添季豹又何求
行雲流水隨風去仙不相招佛亦收

園中芙蓉盛開病中不得見戲題一絕寄調章淮

樹太守家春圃觀察香亭別駕

九月芙蓉開滿園病夫無福倚欄杆妬妻瘧母真相似
家裡紅粧一見難

送孔南溪方伯予告歸里

欣聞永叔賦歸田海內爭看陸地仙上疏官能辭二品
懸車齒尚欠三年閒拋案牘親書卷笑把衙參換晏眠
回首甘棠千萬樹晚香吹滿夕陽天
同年零落曉星殘愛我真將國士看詩錄千篇常口誦
坐留一刻也心懽青山路隔相逢易白髮人歸再見難
如此交情怎能斷他生還擬續金蘭

題李尊溪詩集

偶讀尊溪集中存贈我篇傷心數行字回首卅餘年莽

莽長安市萋萋古廟烟多君夙緣好乍見便纏綿土地廟相逢

當時意氣盛重疊上雞壇廣集諸年少賡歌到夜闌乖

簾遮石洞送客出花欄記否讀書處高陽池館寒君寓所為

李高陽相公故居

秋風吹蕊榜忝竊到蓬瀛從此通家誼兼之折輩行出

鄧遜齋先生門下鄧妻呼乾阿嫻郎是小門生借得華

堂住連墻笑語聲

事過多如夢年華去若風幸虧鴻爪跡都在越吟中雅

麗陰鏗似清幽裴廸同名場可容易剩此兩衰翁

故事江寧榜發鹿鳴宴設于府署今年章太守之

子及其從子均獲中雋于是父為主人而醮其二

子于堂上士論榮之予以詩賀

黃堂張樂宴文星雛鳳雙飛出鯉庭金字榜懸千佛麗

桂花枝覆一門青竟將國瑞成家慶定有仙雲上畫屏

寄語鹿鳴歌緩緩佳兒聽罷阿翁聽

謝金圃侍郎以舊時督學典試江南余病中不能

走謁寄詩奉簡

久簪斑管侍岩廊謝傅忠勤動玉皇已命三年羅俊

秀更教八月舉賢良秋高碧落翔鳴鳳菊滿重陽正晚

香自種明珠自家採一時佳話遍江鄉

衡門曾記訪袁絲臘嫩山青雪霽時卿月有心憐小草
鷓鴣無分託高枝侍郎為第四子索婦班春風過禽魚
喜近日雲來水竹知剛值采薪難走侍獻將長句寫相
思

哭雲南撫軍裴二知先生

退思圖上命題詩拜別卿雲有幾時禮士渾忘身八座
憂民早見鬚千絲一家琴學風何古公舉家善琴萬里棠陰
政可知赳此哀榮歸亦好只憐綠野負心期

自題

不矜風格守唐風不和人詩鬪韻工隨意閒吟沒家數
被人強派樂天翁

笑

鹵簿逢兒住延之笑不勝我憐穿鼻馬人羨得霜鷹
香風隔墻至蜂蝶滿堂譁可惜尋春誤花開是別家

春圃香亭兩弟官白下余不能無秦誣楚諉之累
戲題一詩

紛紛何氏來殘客似向顏家覓要人速把庭籬隔門戶
謝瞻還覺有風塵

靜掩

靜掩衡門細補籬自家筋力自家知病雖良去身終弱
老亦何妨曠不宜齒長漸無同話客名高愈有欲刪詩
把書攤向烟波看半作經師半釣師

遣興一首學皮陸體

家居盤谷泛杯湖便是真靈位業圖仙鶴銜書將字認
游魚逐隊可名呼青琴曲裡歸雲引玉女溪邊調水符
儘與幽人供寂寞覺花忍草試工夫

偶然

偶然三月惠風靜關住一門花氣香學博愈增編纂累
園深時覺歲修忙生前眼福猶嫌少死後文名自信長
料得安排天總定只嫌無路問蒼蒼

殘冬

殘冬餘幾日風雪滿牕櫺有室徒生白無書可殺青胸
中齊物論案上度人經欲語憑誰告聞呼凍雀聽

病後作

天不輕作秋一雨一回涼人不容易老一病一頽唐我
年六十四今春猶聰強上山不嫌高坐夜不厭長有時
逸興發跳躍如生麀人皆笑此翁童心猶未忘無端秋
一瘧吾精竟消亡攬鏡不相識樂樂瘦異常加餐輒腹
悶多言復氣傷彷彿傳元言欲捨形高翔回思春日健
並未隔千霜如何我羨我已作兩人望始知將盡燈不
可使扇颺又如將落葉何堪風再戕寄語衰年人寒暑
宜周防

歲除

左插梅花右水仙當中一叟聳吟肩歲除自把光陰算

又在詩中過一年

掃地焚香有所思
閒人閒日此閒時
誰知未了閒人事
蛛網撩殘剩一絲

傷心

傷心六十三除夕
都在慈親膝下過
今日慈親成永訣
又逢除夕恨如何
素琴將鼓光陰速
椒酒虛供涕淚多
只覺當初懽侍日
千金一刻總蹉跎

守歲

家家守歲歲不住
未到五更歲已去
余不守歲戀余
夕陽欲下猶躊躇
一來一去歲無痕
何必強分舊與新
只愁飲到屠蘇酒
被歲排爲末了人
瓶盆焚罷長恩祭
階下兒童小遊戲
獨坐黃昏悄不言
且把光陰歲歲記
久不衙參不早朝
元辰睡起紅日高
門亦不守無人敲
敲門或者梅花梢

吳協璜把酒對月圖

延陵先生夜不寢
對天揮杯勸月飲
月亦多情解酬客
一泓清露杯中滴
君爲主月爲賓
一酬一酢三更天
衣裳飄飄欲化烟
嫦娥天上笑且言
此人又是飲中仙

元日牡丹詩

魏紫姚黃元日開
真花人當假花猜
那知羯鼓催春早
富貴偏從意外來

約束紅香冷更妍
飄揚霞珮賀新年
果然不愧花王號

獨占春風第一天

如何絕代玉環姿蜂未聞香蝶未知想與梅妃爭早起
嚴粧同對雪飛時

饒他傾國與傾城自結空山采伴行一樣人間金紫貴
占人先處惹人驚

惱殺當年武媚娘催開不肯逐羣芳而今替我飛香早
可乞清平第四章

重重錦帳護輕風脉脉私心感化工憐我白頭花福少
預支春色與衰翁

一自青溪擁絳紗年年冷處受繁華也虧早把心香展
不作隨行逐隊花

藏雪

平生最愛月與雪月不能留聽其缺雪更多情來我家
天之所賜敢拜嘉庚子元宵雪不止主人攘臂清晨起
呼僮率婢拉老妻滌甕排壘抱筐篚奔前斛雪如斛糧
晶瑩潔白裁人倉不許纖瑕汚玉粒兼持仙杵擣元霜
骨冷魂清神轉王雲階月地全搜蕩已經干斛貯堂中
猶瞪雙睛看瓦上我聞東吳明珠貢百琲食之不了渴
與饑又聞穆王俘玉萬萬隻枉費人間八駿力何如我
之所寶人勿趨片片瓊瑤奇貨居大夫伐木無此樂匹
夫懷璧殊堪娛轉眼驕陽六月紅取烹綠茗生清風更
把楊枝一滴灑醫盡人間熱中者

攝生

瓶裡花難謝
灰中火易儲
雖然同一盡
終竟緩須臾
徐福蓬萊藥
軒轅罔象珠
何如慎眠食
春夢自蘧蘧

感瓶中梅

戲折紅梅枝
置之磁瓶中
其時花千樹
欣欣開春風
設身為梅想
得無心忡忡
不與衆爭春
而來伴衰翁
翁亦慙頭白
不稱此花紅
因之有薄籠
安放傍簾櫳
一朝天嚴寒
雪壓霜封園
花盡凋敗細
蕊亦疲癯
視我瓶中梅
精神方隆隆
如以金屋姝
下視山村農
豈知我折時
並非情所鍾
偶然與到耳
採取由奚童
凡此榮與枯
豈可常理通
一笑語梅花
萬事皆天公

三月二日小步池上覺兩岍少碧桃數枝方擬購
買而回頭見叉手揖者門生楊近仁也問何來曰
爲先生送碧桃來不覺狂喜爲賦一詩

起念買花栽
回頭見花至
公然天地間
有此如意事
機緣巧湊誰
安排桃花未
開心花開人
生三萬六千
日似此心開
有幾回

景陽閣席上題扇贈歌者曹郎

角巾珠履貌
蓮花邂逅相
逢羽士家疑
是仙人王子
晉吹笙招我
泛流霞

吾家臨汝最情多

春圃

手撥檀槽耳聽歌
要試步虛聲

一曲景陽高閣舞
曹婆

萍逢不厭白頭狂，恰恰身材似我長。
並坐燈前堪入畫，一枝瓊樹倚斜陽。

平生不飲沾唇酒，此夕郎教代數卮。
惹得歸來紅袖問，爲誰沉醉夜深時。
能工楷法寫丹青，不愧張文喚小生。
只爲髫年曾上學，歌唇時帶讀書聲。

三更分手話依依，道返吳江見面稀。
且把深情託紈扇，滿懷風送玉人歸。

偶成

人人都厭黃梅雨，我願黃梅雨暫留。
安得潺湲過三伏，一晴天已是新秋。

一花一草靜相於，槐有長眉松有鬚。
荷葉生來不知雨，星星化作滾盤珠。

閒掃蕭齋靜掃蠅，修行何必定如僧。
幽蘭花裡熏三日，只覺身輕欲上昇。

永建五年雙魚洗歌

徐君龍飲貽我雙魚洗，洗中有永建五年銘。
內府寶造用

九字篆初變隸，陽文精土花。漬久翠的爍，水銀湧過光。
清瑩考建元年，乃漢順其時。擁立由孫程，十九奄人輿。
緘血安知不將此，洗盛厥後洛陽火。德改家家呼唱董，
逃行長安鐘簾盡灰燼。此洗何幸全其形，鬱堙坻伏向
何處。一朝古貌山中呈，傷哉中郎喪老成。得見虎賁如

典型何況此物真漢器閱歷人世千餘齡我學子訓摩
銅狄更慕圖澄解塔鈴欲詢往事再三扣雙魚作答聲
丁丁
一笑
啞然一笑向東風蟬唱分明賦惱公底事蜘蛛張網密
只羅粉蝶不羅蜂

錢坤一少宗伯典試江南榜後過訪隨園卽事有

贈

同徵四十六年前殿上揮毫事宛然每憶雲仙看碧落
忽持玉尺下江天鬚眉換盡清談在桃李栽還舊雨憐
正擬尋公呼蠟屐八駒先已唱門邊

愛我山莊處處幽一邱一壑總勾留卿雲氣煖花爭迎
老鶴情深語未休難得相逢剛九日自憐此會亦千秋
知公寫贈孤松意朝野于今兩白頭

賜畫松一幅

哭陽湖相公十六韻

同榜滿朝空晨星一相公如何辭湛露忽又去秋風德
量裴中立經綸魏弱翁物情深惋惜主眷極初終憶
昔聯鑣日分遊上苑東衣披宮錦麗酒鬪蠟花紅極貴
原難料賡歌但覺工一朝雲海隔卅載信音通吏部銓
衡職綸扉燮理功格天無異術行已祇孤忠嶽嶽翔威
鳳棲棲剩冥鴻書來常念舊言出必由衷影畫凌烟閣
身歸兜率宮黃墟真渺渺白日太匆匆故第難旋馬靈

旗易轉蓬關心羊太傅俎豆是誰供公無子

靜裡

靜裡工夫見性靈井無人汲夜泉生蛛絲一縷分明在不是閒身看不清

六合唐梅歌 有序

六合西門外吳氏田庄有二古梅相傳爲唐時仙人張果所種語雖不經然奇古輪囷在滁州歐梅孤山林梅之上殆千餘年物耶惜其隱于村野爲歌惜之

有花看梅人所同無花看梅我所獨我來棠邑看古梅九月中旬霜氣肅一株天矯乖龍翔一株湮鬱瘦蛟伏

皮肉破碎筋骸存跟跼支離苔蘚綠想當花開正月天香雪橫陳千萬斛使生孤山鄧尉間一奏定邀天子目或賜宸翰或寫形頃刻光輝滿山谷如何淹蹇野田中此梅有壽真無福香氣常全牛矢爭繁枝苦被樵夫斲世間萬事總皆然彼姝往往泥塗辱我欲收此千年春傍花特起三間屋廣招海內看花人一杯一酌揮珠玉傷哉吾齒已衰頽心自有餘力不足急把隄麋磨半升灑向花間慰寂寞縱教此樹無人看或者此詩有人讀

香亭任江城別駕一年奉廣東太守之命賦詩送之

太守宮從別駕移五羊城上柳如絲 君恩深處忘途
遠家運隆時惜我衰得路馬宜加努力出山雲敢問歸
期不圖焚却西征賦依舊仍吟渡海詩 香亭初選四川

日出扶桑自古夸羨君此去最榮華吟來紅豆新成識
生長灘江舊有家 弟有紅豆村人 詩集生于粵西 人號香亭人香國路

過梅嶺折梅花珠娘聽說珍珠似老我猶思一泛槎

曾因親老乞江東六載填箠處處同卜宅只離三里近
開花分看兩家紅兒童梨棗交相讓娣姒笙歌聽未終
底事天風忽吹散一場春夢又匆匆

木落天寒雁失羣兩家離緒話紛紛眼前田舍君交我
身後妻孥我托君甲子已周無可老荆花重合轉難分
擬登江上高峰送日極孤篷入斷雲

馬孺人歌爲周梅圃觀察作

女貞木鶴鷗不敢棲婺女星浮雲不敢翳潭州馬孺人
尻運邁陽九明季黃巾亂闔門獨自守有兒奕奕人中
豪賊欲餌之開科招母命拒賊賊大怒三百六十二人
同受刀母受縛去罵聲琅琅兒求代母伏地頭搶更有
諸姬跪哭母旁母問汝何志僉云一死無他腸母乃大
笑神洋洋難得三婦艷都是千年霜人生貴死得其所
耳全家赴義皎如明月光果然 聖人出妖雲滅綽楔
煌煌加寵秩兒子捧盤祭母穴仇人之首猶帶血孫曾
子姓多纓簪苦節之後報以甘嗟乎孺人之賢誰與偶

古來只有王陵母

題南浦觀察雙鶴對立圖

一鶴矯翼翔一鶴凌風舞一客披衫立軒軒共霞舉客
乃青雲人朝陽丹鳳侶胡爲不冠巾與鶴相爾汝客云
我有心別自藏靈府不能向人言惟有對鶴語鶴住我
爲賓我行鶴爲主行將挂烟帆歸看鴛湖雨高于清獻
公一琴亦不取畫師更清絕白描擅千古人立不倚山
鶴立不踏土安得乘軒人風懷淡如許

小雪日香亭弟贈灰鼠裘

雪珠如豆打茅茨阿弟貽裘趁此時仙鼠蒙茸真可愛
老身長短更相宜著來小試妻孥看分得餘溫手足知
但願多情如晏相一披便作卅年期

香亭和

雪壓茅簷雨掩茨山風珍重乍來時衰年每怯豐貂
重小冷無如此服宜毛裡天親千古共箕裘心事兩
人知期兄當作姜家被同曳同披沒了期

嫁鶴詩和章淮樹觀察

桐城觀察水雲居爲鶴求婚寫聘書園叟代行親迎禮
高軒一乘下蓬廬

隨園山瘦稻梁稀爭及安園飲啄肥笑嫁仙禽如嫁女
勝吾家處讓他飛

三年棲息主人恩一旦穩穩舞出門未免數聲離別淚

小倉山房
滿山花鳥盡消竟

送鶴丁寧語莫忘好隨嘉耦共翱翔九臯鳴處須珍重
休啄梧桐惱鳳皇

調公寵姬鳳姊

